

PRVI ZAVJET VJERNOSTI NA AKABI

بيعة العقبة الأولى

Sva arapska plemena, bez izuzetka, su u dane hadža dolazila u Meku, radi obavljanja hadža i obično su prebivala na Mini. Muhammed, s.a.v.s., koristio je ovu priliku, pa je tajno noću posjećivao ova plemena i pozivao ih u islam. Od najpoznatijih arapskih plemena iz Medine bila su plemena Evs i Hazredž. Između ova dva plemena stalno se vodio rat. Pored tih plemena, u Medini su živjela i židovska plemena. Židovi su prijetili Evsu i Hatredžu, govoreći: "Nama će biti poslan poslanik kome će silaziti objava. Mi ćemo ga slijediti i on će nas predvoditi u ratu protiv vas."

Hadž kojem je prisustvovala delegacija iz plemena Evs i Hazredž bio je jedanaeste godine po poslanstvu Muhammeda, s.a.v.s. Jedne noći, dok je Muhammed, s.a.v.s., bio na Akabi na Mini, čuo je glasove ljudi pa im se približio. Ti ljudi bili su iz Medine, iz plemena Hazredž, i bilo ih je šesterica. Muhammed, s.a.v.s., prišao im je i upitao:

"Ko ste vi?"

Oni su mu odgovorili: "Mi smo iz plemena Hazredž!"

Poslanik je ponovo upitao: "Vi ste, dakle, saveznici židova?"

"Da!" - odgovorili su.

Zatim im je on predložio da sjednu kako bi im se obratio, što su oni prihvatili. Muhammed, s.a.v.s., objasnio im je činjenice vezane za islam i svoju misiju i pozvao ih u Allahovu, dž.š., vjeru i proučio im odlomak iz Kur'ana, a.š. Onda su jedni drugima rekli:

"Znajte da je on poslanik, čijim su nam dolaskom Židovi zaprijetili, pa nemojte dozvoliti da nas preteknu u odazivanju njemu!"

Zatim su prihvatili njegov poziv i primili islam. Ovi ljudi bili su najrazumniji u Jesribu (Medini), a rat ih je već bio iscrpio, tako da su željeli da Muhammedova, s.a.v.s., misija bude rješenje za zaustavljanje rata. Nastavili su, govoreći Poslaniku, s.a.v.s.:

"Mi smo (u Jesribu) ostavili naš narod na tolikom stepenu neprijateljstva i zla da ne postoji narod na svijetu sa tako raširenim zlom i neprijateljstvom, pa se nadamo od Allaha, dž.š., da ih ujedini tobom. Mi ćemo im se vratiti i pozvati ih u ono u šta pozivaš i predočiti ćemo im od vjere ono čemu si nas ti pozvao i što smo ti odgovorili. Ako ih Allah, dž.š., okupi oko tebe, neće biti čovjeka cjenjenijeg od tebe!"

Dolaskom ove grupe ljudi u Medinu, došla je i misija islama, tako da u Medini uskoro

ne bi kuće, a da se u njoj nije znalo o Muhammedu, s.a.v.s. Slijedeće godine na hadž je došlo dvanaest ljudi iz ovog plemena. Među njima bila su peterica od onih koji su prisustvovali hadžu prethodne godine. Oni su dali prisegu Poslaniku, s.a.v.s., na odanost islamu, a on je s njima poslao Mus'aba ibn Umejra da podučava stanovnike Medine islamu i da ih poziva u vjeru. Odmah po svom dolasku u Medinu, počeo je pozivati ljude u islam i mnogo ljudi prihvatiti njegov poziv. Mus'ab ibn Umejra dobi nadimak El-Mukri' ("Karija"), zato što je podučavao ljude učenju Kur'ana.